

道行般若波羅蜜經

才八

六十九
鱗八

47470



元祿九年丙子二月日重脩

皇國華國 帝齋綴昌

佛日增輝 轉輪常轉

山城州天安寺法金剛院置

一 庚

道行般若波羅蜜經卷第八

後漢月支三藏支婁迦識譯

鱗

道行般若波羅蜜經第二十一

佛語阿難菩薩隨時欲學般若波羅蜜隨法
欲行般若波羅蜜是時一佛界中魔各各驚
自念言欲使菩薩中道得阿羅漢果若疾使
得阿耨多羅三耶三菩疾使得佛復次阿難
弊魔愁毒為憂見菩薩習行於般若波羅蜜
復次阿難是時諸弊魔四面放火風恐怖是
菩薩若令畏懼衣毛當起使心一反亂念轉
復佛語阿難魔不遍行亂菩薩若有行亂者
有不行亂者阿難白佛言何等菩薩為魔所

亂佛語阿難若有菩薩聞深般若波羅蜜不
樂者弊魔便行住壞復次阿難若有菩薩聞
深般若波羅蜜心狐疑者自念若有無有耶
如是阿難菩薩為弊魔所得便復次阿難若
有菩薩遠離於善師是菩薩所聞般若波羅
蜜深事不欲聞也亦不了也亦不知也何因
守般若波羅蜜用是故阿難是菩薩弊魔所
得便者復次阿難若有菩薩與惡師從事用
是故弊魔得菩薩便是菩薩言正是我所喜
師也當成我所願餘多有菩薩非我善厚也
用是故弊魔得菩薩便復次阿難聞是深般
若波羅蜜時教餘菩薩用是為學用是為寫

我尚不了其事汝能了耶若有時菩薩與異
菩薩轉相輕易言我所行是也汝所行非也
尔時諸弊魔歡欣踊躍是時弊魔便作異被
服像來嘆菩薩言汝於某國生其種姓家是
菩薩聞是語便輕易餘成就不貢高菩薩是
貢高菩薩功德薄少無阿惟越致相也是菩
薩於阿惟越致中功德少自貢高輕餘菩薩
言卿不及我所行用是故弊魔大歡欣言今
泥犁禽狩薜荔墮者不少弊魔當復增其念
所語所說多有信用者聞之者無不隨其言
者作是學者瞋恚益增心所作爲顛倒用是
故身口心所作爲輕反用是故其人在泥犁

禽獸薜荔中罪益增用是故弊魔大歡欣踊躍無有極若求菩薩道家與求羅漢道人共諍介時弊魔自念菩薩離薩芸若遠雖遠亦不大遠菩薩又與菩薩共諍介時弊魔念言兩離佛遠佛語阿難未得阿惟越致菩薩與阿惟越致菩薩共諍罵詈阿惟越致菩薩是菩薩罵以隨心所念轉懷怨恨心一轉念聽却一劫菩薩雖有是惡念不捨薩芸若却無數劫極甫當更復從發意起阿難白佛言心所念惡寧可得中悔不當乃却就介所劫乎佛語阿難於我法中廣大極可得悔佛語阿難若有菩薩念惡有恨自歡欣復語他人是

人不可復使悔也若有菩薩若罵詈瞋恨自
念咄我所作無拔後終不敢復作是復自考
責人道難得用是故悉當忍於人何況乃當
與人共諍言乎我當爲十方人作橋令悉蹈
我上度去我有是意寧當復與人共諍耶住
立當如龍聳羊諸惡悉當忍諸惡心不當犯我
作佛時悉當安十方人得般泥洹我不復與
人共諍瞋恚於人爲用羅漢道故阿難白佛
言菩薩菩薩自相與共止法當云何佛語阿
難菩薩菩薩轉相視當如視佛心念言共一
師共一船共一道如是若是所學我亦當學有餘
菩薩欲喜學阿羅漢辟支佛道若與從事設

有是人者我不與從事其有世世欲求佛道者當與相隨如是學為共一法學

道行般若波羅蜜經學品第二十二

須菩提白佛言菩薩學無常為學薩芸若學無所生為學薩芸若學去離淫為學薩芸若學滅為學薩芸若佛語須菩提汝所問學無常為學薩芸若者於須菩提意云何是怛薩阿竭本無隨因緣得怛薩阿竭本無字寧有盡時不須菩提白佛言不佛語須菩提為學薩芸若如是學為學般若波羅蜜如是學為學怛薩阿竭陀為學力為學無所畏為學諸佛法菩薩學如是者悉行諸學法菩薩摩訶

薩作是學魔及魔官屬不能中道壞菩薩如
是學為疾得阿惟越致菩薩如是學者為疾
近佛樹下坐菩薩如是學為悉學佛道菩薩
如是學為習法也菩薩如是學為極大慈哀
如是為學等心菩薩學如是三合十二法輪
為轉菩薩學如是為學度滅十方天下人菩
薩學如是為學甘露法門佛語須菩提不懈
怠人乃能學是作是學為學十方天下人道
菩薩學如是者不入泥犁禽狩薜荔中菩薩
學如是終不生邊地如是學不復生愚癡貧
窮中如是學不復盲聾瘖瘂如是學為不
毀十戒如是學為不隨解除卜問如是學遠

離不持戒人菩薩如是學不願生尼惟先天
上何以故菩薩有漚沍拘舍羅故般若波羅
蜜何等漚沍拘舍羅從般若波羅蜜中出漚
沍拘舍羅持漚沍拘舍羅威神入禪不隨禪
法菩薩學如是為得淨力為得無所畏力為
得佛法淨力須菩提白佛言佛所有諸法本
皆淨何等為菩薩得法淨佛語須菩提菩薩
學如是為學無所得淨法諸法淨如是須菩
提菩薩行般若波羅蜜時不悔不厭是為行
般若波羅蜜未得道者愚癡不曉是法不見
是事菩薩用人故常精進人見我亦當効我
精進用是故菩薩得力精進無所畏菩薩作

是學悉知十方天下人心意所念無能過者
譬如地出金銀少所處出耳如是須菩提少
所人隨般若波羅蜜法教學譬若須菩提少
所人索遮迦越羅處索小國王多如是須菩
提少所人隨般若波羅蜜法教學從是中多
索阿羅漢辟支佛者有初發意菩薩少有隨
般若波羅蜜教者既有學般若波羅蜜少有
得阿惟越致者菩薩當作是念我當力學慕
及阿惟越致復次須菩提行般若波羅蜜不
持瞋恚意向人不求他人短心無慳貪心不
毀戒心不懷恨心不懈心不迷亂心不愚癡
時菩薩學般若波羅蜜時諸波羅蜜皆悉屬

學般若波羅蜜為照諸波羅蜜為悉入諸波
羅蜜學般若波羅蜜為具足餘波羅蜜譬如
人言是我所便外著十二品如是須菩提菩
薩學般若波羅蜜皆悉屬譬如須菩提人死
時命盡身諸根悉滅如是須菩提菩薩學般
若波羅蜜為學諸波羅蜜皆悉屬菩薩欲學
度諸波羅蜜當學般若波羅蜜菩薩欲學般
若波羅蜜為學無極於須菩提意云何一佛
界中所有人寧多不須菩提報佛言甚多佛
言若有菩薩供養一佛界中乃爾所人供養
自盡壽命其福寧多不須菩提白佛言甚多
佛語須菩提不如菩薩守般若波羅蜜如兩

指相彈頃佛語須菩提般若波羅蜜極尊用
是故疾得佛如是須菩提菩薩欲得阿耨多
羅三耶三菩爲十方人中獨尊終視十方貧
窮孤獨者欲求佛境界者欲得佛智慧所樂
者欲得如師子獨鳴者欲得佛處者悉欲得
是者當學般若波羅蜜菩薩學般若波羅蜜
者爲悉學餘法須菩提白佛言菩薩爲復學
阿羅漢法耶佛語須菩提雖知阿羅漢法不
樂行不學阿羅漢所作功德云何當得也阿
羅漢所行菩薩悉知不學不行不於中住菩
薩作是學天下無有能過者悉過阿羅漢辟
支佛上如是爲近薩芸若菩薩作是學不離

般若波羅蜜遠也。為行般若波羅蜜菩薩作
是學於薩芸若法中不增不減離阿羅漢辟
支佛道菩薩若復作是念持是般若波羅蜜
當得薩芸若有小想為不行般若波羅蜜亦
不有般若波羅蜜之相當持得薩芸若亦不
念亦無見亦無所想為是行般若波羅蜜

道行般若波羅蜜經守行品第二十三

是時釋提桓因在大會中坐作是念菩薩行十
方天下人無有能過者何況自到至佛乎十
方人道難得既得壽命為安隱有一發意行
佛道者難得何況至心行佛道者乎欲為十
方天下人作道導首是人難得是時釋提桓因

化作文陀羅華取持散佛上散已作是說行
菩薩道者乃向佛道乎所願悉成爲近爲悉
護作是行者爲悉成佛諸經法薩芸若經法
怛薩阿竭經法悉具足阿惟越致經法亦爾
釋提桓因言人有至心索佛於是法中一反
念終不遠釋提桓因言我欲使人於法中益
念不厭生死之苦一切天上天下爲苦用人
故悉當忍勤苦之行心作是念諸未度者悉
當度之諸未脫者悉當脫之諸恐怖者悉當
安之諸未般泥洹者悉皆當令般泥洹釋提
桓因問佛言新發意菩薩勸人助其歡喜得
何等福隨次第上菩薩勸人助其歡喜得何

等福乃至阿惟越致上至阿惟顏勸人助其
歡喜得何等福佛語釋提桓因須彌山稱之
尚可知斤兩從勸助代初發意菩薩歡喜其
福不可量佛語釋提桓因一佛境界尚可稱
知斤兩阿闍浮菩薩行勸人助其歡喜其福
無有科限佛語釋提桓因一佛境界中諸海
所有水取一髮破為百分從中取一分以一
分之長取海水盡尚可數知幾滂阿惟越致
菩薩行勸人助其歡喜其福不可數佛語釋
提桓因阿僧祇佛刹所有境界虛空持一斛
半斛一斗半斗一升半升尚可量空知幾所
阿惟顏菩薩行勸人助其歡喜其福不可極

釋提桓因白佛言爲魔所亂聞是不助歡喜
魔官屬人間是不助歡喜者從魔天上來下
聞是不助歡喜者何以故若有意索佛者爲
壞魔境界也有發意索佛者當助其歡喜是
爲壞魔境界心不離佛不離經不離比丘僧
如是當助其歡喜佛語釋提桓因如釋提桓
因所言助其歡喜者爲近佛用是助歡喜之
功德世世所生處爲人共欲得供養未常有
聞惡聲時不恐當歸三惡道常生天上在十
方常尊何以故如是人助菩薩歡喜者爲悉
施護十方人何以故初發意菩薩稍增自致
至佛成就作佛已當度脫十方天下人須菩

提白佛言心譬如幻何因當得佛佛語須菩
提於須菩提意云何汝寧見幻不須菩提言
不化幻亦不見幻心離化幻離幻心雖離是
見異法當得佛道不須菩提白佛言不見亦
不離化幻離幻心亦不見當得佛亦無法亦
無見當說何等法得耶不得乎是法本無遠
離亦本無若得若不得本無所生亦無有作
佛者設無有法亦不得作佛須菩提白佛言
設爾般若波羅蜜離本無對法離本亦無對
亦無證亦無守亦無行亦無有法當有所得
何以故離般若波羅蜜本無形故本無遠離
何因當於般若波羅蜜中得佛佛者離本無

所有何所本無所有當得佛者佛語須菩提
如須菩提所言離本般若波羅蜜無所有離
本薩芸若無所有佛語須菩提雖知離般若
波羅蜜本本亦無所從生菩提當作是思惟
深入守是故離本無所有得作佛佛語須菩
提雖知離本般若波羅蜜無所有是爲不守
般若波羅蜜不具足行般若波羅蜜者不得
作佛也佛言如須菩提所言不用得般若波
羅蜜故得佛也亦不用離無離得作佛亦不
可離般若波羅蜜得作佛不得般若波羅蜜
者不得作佛須菩提白佛言菩薩行般若波
羅蜜甚深難及佛語須菩提汝所言菩薩行

般若波羅蜜甚深難及菩薩所言勤苦行深
與之法不在取泥洹須菩提白佛言如是所
說事菩薩不爲勤苦行何以故亦無有作證
者亦無般若波羅蜜中得證者亦無有經法
得作證者菩薩聞是不恐不急不難不畏是
爲行般若波羅蜜雖作是行亦不見行是爲
行般若波羅蜜雖近作佛亦不見是爲行般
若波羅蜜遠離羅漢辟支佛亦不見亦不念
是爲行般若波羅蜜譬如空中無念若有近
若有遠何以故空本無有形故行般若波羅
蜜無有離佛遠離佛近何以故般若波羅蜜
無有形故譬如幻師作化人化人不作是念

師離我近觀人離我遠何以故化人無有形
故般若波羅蜜亦如是不作是念羅漢辟支
佛道離我遠佛道離我近也何以故般若波
羅蜜無有形故譬如影現於水中不作是念
何因影現於水中若所有近者不念言近若
遠者亦不念言遠何以故量無有形故般若
波羅蜜如是亦無是念羅漢辟支佛道為遠
耶佛道為近乎何以故般若波羅蜜無有形
故般若波羅蜜適無所愛適無所憎怛薩阿
竭所有無所著無所生般若波羅蜜亦如是
亦無所生亦無所著譬如怛薩阿竭化作人
不作是念羅漢辟支佛道離我遠亦不言佛

道離我近何以故化人無有形故般若波羅
蜜亦不作是念羅漢辟支佛道離我遠亦不
念佛道離我近何以故般若波羅蜜無有形
故譬如工匠黠師剋作機關木人若作雜畜
木人不能自起居因對而搖木人不作是念
言我當動搖屈伸佞仰令觀者歡欣何以故
木人本無念故般若波羅蜜亦如是隨人所
行悉各自得之雖爾般若波羅蜜亦無形亦
無念譬如造作海中大船所以者何作欲度
賈客船亦不作是念言我當度人何以故船
本無念故般若波羅蜜亦如是隨人所行悉
各自得之般若波羅蜜亦無形亦無念亦如

是譬言如曠野之地萬物百穀草木皆生其中地亦不作是念言我常生也不生也般若波羅蜜生諸經法亦不念言從中生與不生何以故般若波羅蜜本無形故譬如摩尼珠悉出其實般若波羅蜜悉出其經法分別教授雖爾般若波羅蜜亦無念譬言如日照於四天下其明亦不念言我當悉照般若波羅蜜悉照諸經法雖爾般若波羅蜜亦無念譬言如水無所不至水亦不作是念言我當有所至般若波羅蜜悉至諸經法雖爾般若波羅蜜亦無念譬言如風無所不至風亦不作是念言我當有所至般若波羅蜜成就諸經法亦如是

雖爾般若波羅蜜亦無念譬如須彌山巔以
忉利天爲莊飾須彌山亦不作是念言我當
上治忉利天莊嚴般若波羅蜜成就薩芸若
雖爾般若波羅蜜亦無念譬如大海悉出諸
珍琦寶物海水不作是念言我當從中出珍
寶般若波羅蜜悉出生諸經法亦是雖爾
般若波羅蜜亦無念譬如佛出生諸功德悉
覆輦輦等心加於十方人般若波羅蜜成就於
諸經法亦如是

道行般若波羅蜜經強弱品第二十四

舍利弗問須菩提言菩薩摩訶薩行般若波
羅蜜爲高行耶須菩提報言我從佛所聞事

菩薩摩訶薩行般若波羅蜜爲無有高也若
千百千愛欲諸天作是念當爲十方人發意
爲菩薩道者作禮何以故行般若波羅蜜不
中般泥洹故如是菩薩爲勤苦行不於是法
中墮落取證須菩提語諸天言雖不中道墮
落取證是不爲勤苦勤爲十方不可計阿僧
祇人被法鎧度今得泥洹是乃爲勤苦之難
是人本無本無索不可得也如是菩薩作是
念爲欲度人度十方人爲欲度空何以故空
亦無有遠亦無有近亦無所有有用是以菩薩
勤苦行索人本無有欲度人爲度虛空被德
鎧用人故被德鎧欲過度人是故菩薩爲被

德鎧如佛所說人無有本曉如人本無所有
是爲度人菩薩聞是不恐不怖是爲行般若
波羅蜜離人本無人離色本無色離痛癢思
想生死識本無識離諸經法本無諸經法菩
薩聞是不恐不懈是爲行般若波羅蜜佛語
須菩提何因菩薩不恐不懈須菩提白佛言
本無故不恐本淨故不懈何以故索懈怠本
本無有所因懈怠亦復無有菩薩聞說是不懈
不恐不怖是則爲行般若波羅蜜菩薩行是
時諸天皆爲作禮諸梵天皆爲作禮佛語須
菩提不但諸天諸梵天爲菩薩作禮上至阿
會亘修立何彼摩那阿會波羅及上至阿迦

貳吒諸天皆爲行般若波羅蜜菩薩作禮十方不可復計阿僧祇現在諸佛悉念行般若波羅蜜菩薩悉共擁護知是行般若波羅蜜菩薩阿惟越致恒邊沙佛刹其中所有人悉使爲魔一魔者化如恒邊沙人悉使爲官屬設使爾所魔各各乃爾所官屬欲共害行般若波羅蜜菩薩不能中道壞不能中道得便菩薩有二事法行般若波羅蜜魔不能中道使得便何謂二事一者諸經法視皆空二者不捨十方人悉護是爲二事菩薩有二事諸魔不能動何謂二事一者不失本願二者十方諸佛悉護視是爲二事菩薩行般若波羅

蜜時諸天往至菩薩所問訊深經之事諸天
讚嘆善足今作佛不久也當隨是法教立既
隨是法教立者諸有困苦者皆得護諸未得
歸者爲得自歸爲人故作法舍無目者使得
點目隨是般若波羅蜜法教立者十方不可
復計阿僧祇現在諸佛悉共擁護行般若波
羅蜜者諸佛各各於其刹四部弟子中說是
菩薩功德各各讚嘆善之佛語須菩提譬若
我今讚嘆說羅麟那杖那佛佛復言今我刹
界中菩薩行般若波羅蜜十方諸佛今亦讚
嘆說行般若波羅蜜菩薩亦復如是須菩提
白佛言諸佛悉讚嘆諸菩薩如是耶佛言不

賜讚嘆佛語須菩提有行菩薩道未得阿惟
越致者諸佛亦復讚嘆須菩提復問佛何等
爲行菩薩道爲佛所讚嘆佛語須菩提有菩
薩隨阿闍佛前世爲菩薩時所行及羅麟那
杖那佛前世爲菩薩時所行有菩薩隨是教
用是故十方諸佛讚是菩薩復次須菩提菩
薩摩訶薩行般若波羅蜜諸經法信本無所
從生是菩薩尚未得無所從生法樂於中立
信諸法本空是菩薩尚未得阿惟越致信諸
經法本無如泥洹是菩薩尚未得入阿惟越
致地隨是法教立疾得阿惟越致有應是法
行者是故十方諸佛共讚嘆是菩薩菩薩爲

度阿羅漢道地辟支佛道地向佛道地若有
菩薩應般若波羅蜜行者為諸佛所讚嘆知
是菩薩不久在阿惟越致道地立復次須菩
提菩薩聞深般若波羅蜜信不狐疑菩薩作
是念如佛所說諦無異是菩薩却後當復於
阿閼佛所聞是般若波羅蜜及餘菩薩所聞
亦復爾作是信般若波羅蜜者以為在阿惟
越致地立若有聞般若波羅蜜信者其德甚
大不小也何況菩薩隨般若波羅蜜法教立
者隨是法教立者為疾入薩芸若須菩提白
佛言設離本本無法不得何所法有作佛者
何所法說有說經者佛言如須菩提所言設

離本本無法不得何所法有作佛者亦無有
法說經者是本無無本何所有於本無中立
無者有本無有當得佛者亦無有本法有作
佛者本無無有說經者亦不可得釋提桓因
白佛言般若波羅蜜甚深菩薩勤苦行乃自
致成佛何以故無有字法無所得在本無中
立者亦無有法當作佛者亦無有說經者菩
薩聞是不恐不怖不疑不猷須菩提語釋提
桓因言如釋提桓因所言菩薩勤苦聞深般
若波羅蜜信不狐疑不猷須菩提報釋提桓
因言拘翼諸經法皆空何所有狐疑猷者釋
提桓因語須菩提言如須菩提所說一切為

說空事爲悉無所者譬如射虛空了無所者
須菩提所說經亦如是了無所者釋提桓因
白佛言如我所說爲隨佛法教耶爲有增減
乎佛語釋提桓因拘翼如佛所說法教等無
異如須菩提所說但說空事須菩提亦不見
般若波羅蜜者亦不見行般若波羅蜜者亦
不見得佛者亦不見薩芸若亦不見得薩芸
若者亦不見怛薩阿竭亦無有得怛薩阿竭
者亦不見無所從生亦不見無所從生證得
之者亦不見十種力亦無有索十種力者亦
不見四無所畏亦不見索四無所畏者經法
本淨亦無所得須菩提隨無所得教立如是

須菩提隨無所得教立者是菩薩為行般若
波羅蜜百倍千倍万倍須菩提菩薩行般若
波羅蜜者捨置佛道地眾羅漢辟支佛道地
不及是菩薩道地欲為十方天下人特尊當
隨佛法教立如是是時忉利天上數千萬天
持化作文陀羅華散佛上散已作是說諸天
言我曹亦當隨法教立時坐中百六十比丘
起正衣服為佛作禮作禮已各各手中有化
文陀羅華持是華散佛上散已作是說我曹
亦當隨法教立是時佛笑口中出若干色其
明至十方佛刹悉為明其明還遶佛三帀從
頂上入阿難從坐起正衣服為佛作禮長跪

問佛佛不妄笑既笑當有意佛告阿難是百六十比丘及諸天當於是波羅劫中作佛皆同一字字溫辰那拘尼摩作佛時比丘僧數各各等壽命亦各各等其壽各十萬歲隨次稍稍作佛作佛時各各盡世兩五色華道行般若波羅蜜經累教品第二十五

佛語阿難作是立者無有能過菩薩作是立爲如佛立作是立無有爲作師者是爲薩芸若立欲作是立者當隨般若波羅蜜教有應是般若波羅蜜行者當知是人從人道中來或從兜術天上來是人或從人道中聞般若波羅蜜或從兜術天上聞或從人道中行或

從兜術陀天上行何以故佛般泥洹後般若
波羅蜜者於十方見若於兜術天上見有行
是般若波羅蜜若書者諸佛悉視護之是菩
薩復轉教人勸樂合偶知是菩薩供養若干
佛以來不於羅漢辟支佛品中作功德知是
菩薩供養若干佛以來學是般若波羅蜜不
恐不怖若有受般若波羅蜜若有學若有持
若有解中事若有隨知是菩薩如面見佛無
異是菩薩不止亦不誹謗般若波羅蜜知是
菩薩供養若干佛以來佛語阿難雖有人於
佛所作功德持用求羅漢辟支佛會當得佛
無異若有菩薩摩訶薩行般若波羅蜜常當

遠離羅漢辟支佛道佛語阿難持是般若波
羅蜜囑累汝阿難我為汝所說經捨置般若
波羅蜜摩訶徧想拘舍羅及諸摩訶惟曰羅
我母所說餘經汝所受設令悉放悉亡雖有
是其過少耳汝所從佛受般若波羅蜜設放
設亡其過甚大不小佛語阿難復囑累汝般
若波羅蜜受學持法當諦學悉具足受悉念
持書字令正無毀減過去當來今現在佛經
身等無異阿難當作是念般若波羅蜜莫使
缺減何以故今佛現在有慈心佛恩德欲報
佛恩具足供養者汝設有慈心於佛者當受
持般若波羅蜜當恭敬作禮供養設有是行

汝悉爲供養佛報恩以汝爲恭敬過去當來
今現在佛已汝慈孝於佛恭敬恩念於佛不
知恭敬於般若波羅蜜慎莫亡失一句佛語
阿難囑累汝般若波羅蜜以爲信若有不欲
離於佛離於經離於比丘僧亦不欲離於過
去當來今現在佛者不當遠離般若波羅蜜
是佛所教佛語阿難若有受般若波羅蜜持
護是爲持過去當來今現在佛教法何以故
過去當來今現在佛皆從般若波羅蜜出生
菩薩欲得佛道者當學六波羅蜜何以故六
波羅蜜是諸菩薩摩訶薩母佛語阿難囑累
汝六波羅蜜六波羅蜜者佛不可盡經法之

歲過去當來今現在佛皆從六波羅蜜出生
佛語阿難汝日日教人盡一佛境界中人汝
悉教令得阿羅漢道雖有是教尚未報佛恩
不如具足爲菩薩說般若波羅蜜汝所教人
悉使得阿羅漢此所作功德持戒精進守道
雖教乃爾所人其福寧多不阿難報佛言甚
多天中天佛語阿難不如持般若波羅蜜具
足爲菩薩說雖不能多一日可雖不能一日
食時可雖不能食時爲說須臾間可其福勝
度爾所阿羅漢菩薩摩訶薩自於般若波羅
蜜念思惟其中事菩薩雖思惟其中事得其
功德出衆阿羅漢辟支佛上去雖思惟其中

事會當得阿惟越致設不中道還說般若波
羅蜜時四部弟子及諸天阿湏倫及鬼神一
佛境界中持釋迦文佛威神一切悉見阿闍
佛及見諸比丘不可計皆阿羅漢諸菩薩亦
無央數以後不復見佛語阿難譬如見國中
人不復見阿闍佛及諸菩薩阿羅漢諸經法
索眼不見亦如是法不見法不念法何以
故諸經法無念不見亦無所益佛語阿難諸
經法皆空無所持亦不可念譬如幻師化作
人諸經法亦如是無念亦無痛何以故無形
故菩薩作是行爲行般若波羅蜜作是學爲
學般若波羅蜜悉欲得六波羅蜜者當學般

若波羅蜜作是學在諸學中最尊無有及者
百倍千倍萬倍是爲安十方天下人作是學者
困厄苦者悉護視是爲隨佛法學是爲隨佛
教有應是學者持手舉一佛境界復著其處
人無有覺知者佛語阿難佛從是般若波羅
蜜中學成過去當來今現在佛無所罣礙拍
智慧法悉從般若波羅蜜具足成欲得般若
波羅蜜限者爲欲得虛空限也何以故般若
波羅蜜不可盡十方之事可計般若波羅蜜
事不可計阿難白佛言何以故般若波羅蜜
事不可計佛告阿難般若波羅蜜事不可計
不可盡般若波羅蜜本淨何以故過去不可

復計佛悉從其中成就得佛般若波羅蜜亦
不增亦不減甫當來不可復計佛悉從般若
波羅蜜成就得佛般若波羅蜜亦不增亦不
減十方今現在不可復計佛悉從般若波羅
蜜成就得佛般若波羅蜜亦不增亦不減是
故般若波羅蜜不可盡虛空亦不可盡

道行般若波羅蜜經卷第八

鱗

出

丁骨反以
言相謂也

瘖

一雅反

偃

紆主反
皆曲見

滌

滌工
字

丰象反

賈客

上古音

玕琦

二音奇



